

entra dans la chappelle avec les autres pour y rendre luy mesme ses vœux & accompagner leur deuotion comme il fist avec un rare exemple, car comme ils auoient esté dans le hazard de mourir de faim, luy d'autre costé auoit pensé perir dans les eauës, & estre enseuely dans le ventre des poissons.

De ceste quantité de malades que la necessité auoit alité, n'en mourut neantmoins aucun fors un hugenot Escossois, qui selon les apparences ne deuoit pas si tost mourir, ie croy que ce pauvre homme estoit hérétique plustost par respect humain, & peur de desplaire à son maistre qu'autrement, puis qu'estant d'une religion si contraire à la nostre il desiroit neantmoins auoir le P. Paul à sa mort & non plustost, comme si Dieu luy eut donné || parole & choix de l'heure de sa conuersion, & en auoit fort enchargé la dame Hebert, laquelle ne voulant manquer à une œuure si charitable & qui concernoit la conuersion & le salut d'une ame egarée, en fist son deuoir & pria le Pere de s'y trouuer, ce qu'il fist à l'instant mesme, mais comme il pensa luy parler de son salut & de se remettre dans le giron de la S. Eglise par une vraye conuersion à Dieu, il luy respondit d'une voix affreuse, souuent reïteree ; mon Pere il est trop tard, il est trop tard, & n'en pû iamais tirer autre responce pendant trois quarts d'heure de temps qu'il demeura là auprès de lui, & mourut ainsi desesperé de la misericorde de Dieu, rendant son ame miserable entrè les mains de Sathan, qui l'emporta au profond des enfers. en punition de son ingratitude & pour auoir refusé la grace au temps que Dieu la luy presentoit. Pour nous ap-